

20667/P
35
I. N. I.
DISSERTATIO INAUGVRALIS MEDICA
DE

CONTRAYERVA,

RECTORE MAGNIFICENTISSIMO
SERENISSIMO PRINCIPE AC DOMINO,
DOMINO

GVILIELMO HENRICO

DVCE SAXONIAE IVLIACI GLIVIAE MONTIVM
ANGARIAE WESTPHALIAE, & reliqua,

SVB PRÆSIDIO

GEORGII WOLFFGANGI WEDELII,

HEREDITARII in Schwarza/
MEDICINÆ DOCTORIS, COMITIS PALATINI CÆSAREI,
SERENISSIMORVM SAXONIÆ DVCVM CONSILIARII

ET ARCHIATRI,

THEORETICES PROFESSORIS PVBLICI ORDINARII,

*Patroni, Præceptoris ac Promotoris sui omni observantia &
honoris cultu attem deueniendi,*

PRO LICENTIA

Summos in arte Medica honores INSIGNIA ac PRIVILEGIA DOCTO-
RALIA, MORE MAIORVM, rite capeßendi,

Publicæ disquisitioni exposita

IOHANNES PETRO DOELLINO,

HALLENSI SVEVO,

IN AUDITORIO MAIORI,

Horis ante & pomeridianis consuetis.

Ad diem Septembr. MDCCXII.

—
IENÆ, Literis KREBSIANIS.

ILLVSTRIS AC LIBERÆ
SACRI ROMANI IMPERII
REIPVLCÆ SVEVO-HALLENSIS
INCLYTO ORDINI SENATORIO,

VIRIS

*Illustribus, Generosis, Prænobilissi-
mis, Excellentissimis, Amplissimis,
Prudentissimis atque Grauissimis,*

DOMINIS

CONSVLIBVS,
QVINQVEVIRIS,
CONSILIARIIS,
SENATORIBVS,
PATRIÆ PATRIBVS,
OPTIME MERITIS,

DOMINIS PATRONIS AC MÆCENATIBVS suis omni pie-
tatis & obsequii cultu ad cineres vsque colendis,


SPECIMEN HOC INAUGVRALE,

cum perpetuæ felicitatis voto,

*in debitæ gratitudinis atque obseruantiz signum humillime
offert*

IOH. PETR. DOELLINVS.





I. N. I.

P R Æ F A M E N.



Maxima semper habita est omnibus seculis simplicium medicamentorum dignitas, adeo ut basis & fundamentum sint merito habenda vniuersæ artis curandi corpus.

Simplicia audiunt, quæ in se spectata & ipsa quidem sunt composita, materialia, & vulgo, & physice dicta, ut mixta & elementata; ita vero audiunt respectu tum præparatorum, non crudorum, sed proximius aptatorum, tum cum aliis sui generis compositorum.

Vti enim elementa sunt simplicium materia prima & secunda; ita simplicia compositorum. Simplex omne prius est composito, ut in mixtis, ita etiam in medicamentis, & sine simplicium notitia medicamenta componi nequeunt.

Omni itaque modo noscenda sunt simplicia & scienda, quique hæc nouit, habet vbiq;ue medicamenta, & hæc & alia vbertim tradit & tractat *Galenus*, qui &

DISSERTATIO INAUGVRALIS MEDICA
ex simplicibus paucioribus & *Analysibus* paratu facillimis vnice eligenda medicamenta monet.

Post vero, quam & præparandi modus subtilior ac sublimior inuentus est, per chimiam, & penitus reiectus & lustratus terrarum orbis, noua indies tum medicamenta inuenta sunt curiosa tractatione, tum illorum accessione, vsu & splendore, mirum quantum adaucta & locupletata alma medicina.

Inter hæc non minimo, sed sublimiori loco eminet CONTRAYERVA, scorzonæræ, ab Hispanis, serpentariæ, ab Anglis in Virginia inuentæ, contra venenis resistens, & virtute sic sua se commendans summe.

Quare consultum duximus, de eius natura, viribus & vsu, loco speciminis inauguralis, agere; quod dum facimus, DEVM O. M. vt nostros hosce labores prosperis beet successibus, deuote oramus.

CAPVT I.

Contrayeruæ nomine & Definitione.



Ræter alias rationes denominationis plantarum non minimi momenti & potissima illa est, quæ a viribus specificis illam impetrauit. Enimvero
hoc

hoc modo vno labore & plantæ nomen discimus, & simul quoque eiusdem virtutis cognitionem nobis comparamus, ita, vt, visa saltim planta, statim memoriæ simul succurrat virtus, qua pollet in morbis abigendis. Adde, quod plerumque hoc ipso denotetur quadam ἐξοχή, siue *excellencia*, qua reliquas plantas superant in persanandis illis morbis, a quibus appellationem hanc sortiuntur, vt exemplo serpentariæ, scorzonæræ, tussilaginis, podagrariæ, aliarumque clarum est.

Et huius generis etiam est CONTRATERVA, de qua hoc loco pluribus acturi sumus. Notabile vero & præmonendum hic est, more medicorum solenne esse simplicia nominare a potiori, seu illa parte, qua in vsum cedunt. Hoc vt anisi, cinnamomi, allii, ceparum & quamplurium aliorum exemplo satis constat, ita quando contrayeruam vocamus, supponimus, intelligendam radicem. Hinc quando secundum alphabeti ordinem recensentur, ponitur contrayerua, *radix*.

Primum & præcipuum nomen, quod apud autores occurrit, est contrayerua, seu, vt aliis scribitur, contrahyerua, vt apud *Rolfincium in ord. & meth. comment. p. 870.* aliis contraierua, contrayerba. In *Taxa Wittebergensi*, a *Daniele Senzerto*, vt videtur, consignata, & primitus in officinalem vsum relata extat, *radix: contracherues vel contrayeruæ; quod inter extracta repetunt: contra cheruæ vel contrayeruæ rad.* Sequuntur idem *Francofurtenses*, qui contraieruam & contra cheruam scribunt.

Vox hæc origine Hispanica est, ab Hispanis Indiam occidentalem incolentibus plantæ imposita, idem notans ac alexipharma, contra venenum, iuxta *Nard. Anton. Recchum l. 8. rerum Med. Nou. Hisp. c. 59. p. 302.* Yerua enim Hispanis & venenum notat, & herbam, vt adeo etiam ab herba derivationem nominis petere possimus, vt contrayerua

idem significet, ac radix contra herbam, i. e. antidotum herbæ, scilicet propriæ. Refert enim *Clusius Exot. lib. 4. c. 10. p. 83.* se ab Elioto accepisse, folia ex radice contrayerua prouenientia præsentissimum esse venenum, ipsam vero radicem non modo illius veneni, sed etiam aliorum antidotum esse.

Primus, quantum inuestigare potuimus, qui nomen & usum radices publice edidit, est *Nicolaus Monardus lib. simplicium medicamentorum ex nouo orbe delatorum p. 311.* ubi eandem sequentibus describit: Ex Charcis prouincia Peruana radices quædam aduehuntur, iridis radicibus valde similes, sed minores & ficulnei folii odore. Hispani Indias inhabitantes Contrayerua appellant, quasi dicas, alexipharmacum, quoniam earum puluis, ex albo vino sumtus, aduersus omne venenum, cuiuscunque tandem sit generis, præsentissimum est remedium, (vno sublimate excepto, quod solæ lactis potione extinguitur,) vomitione illud reiicere faciens, aut per sudores euacuans. Sed & pocula amatoria eo puluere hausto educi ferunt. Ventris etiam animalia pellit. Gustata radix aromaticum quiddam sapit, cum acrimonia coniunctum, quare calida videtur secundo gradu.

Quamuis vero, vt ex dictis patet, iam ante CL. annos in Europam translata sit; paucis tamen primitus visa & cognita fuit, idem fatum experta, quod pleraque simplicia ex nouo orbe delata, quæ primitus, ob virtutes nondum satis cognitæ, nec in nostris terris experientia comprobata, negliguntur, vnde etiam apud Practicos illorum temporum nunquam commendatam, vel in agris in usum tractam, legas.

Sicut vero virtus semel cognita latere nequit, ita idem circa radicem hanc factum est; initio enim præteriti secu-

li iam pluribus innotescere atque in celebriores Angliæ officinas recipi cœpit, donec tandem multis experimentis, ab Anglis potissimum cum successu institutis, magis magisque virtus eius tota Europa innotesceret, adeo ut communi velut consensu & applausu medicorum inter reliquas dudum cognitatas, usuque confirmatas, officinales radices recipi iure meritoque dignata sit, hodieque in celeberrimorum Practicorum compositionibus bezoardicis & alexipharmacis ingrediens primarium constituat.

Alterum nomen, quo primitus innotuit, est *Drakena*. Autor huius nominis est *Carolus Clusius*, qui, post *Morardum*, primus de eadem, sub hoc Drakenæ nomine, scripsit. Locus est *Exot. lib. IV. c. X. p. 83.* ubi Anno Christi, inquit, 1581. Londini mihi donabat generosus eques Franciscus Drake quasdam radices, cum 3. vel 4. lapidibus bezoar Peruanis, quas autumnio præcedente (absoluta nauigatione, qua totum orbem superato Magellanico freto circumiue- rat,) secum retulerat, illas summæ apud Peruanos æstimationis esse asserens; propterea illius, qui mihi eas donabat, gratia huic radici Drakenæ cognomen indebam.

Quod vero hæc Drakena Clusii nostra Contrayerua officinarum sit, non tam ex icone *c. l.* expressa, quam descriptione, quam sequentibus proponit, clare elucescit. Ita vero illa se habet: Semiunciali magna ex parte erat crassitudine & prælonga, subinde in nodos & inæqualia capita extuberans, atque in summis capitibus velut e squamis crassis contexta, dentariæ *τετράκωντα*, siue verius *ένεακόντα*, fere instar, foris nigricans, rugosa & dura, quia resiccata interiore parte alba tenues fibras hinc inde adnascentes habebat, quasdam erassiusculas, sed maiusculas, duras & lentas, e quibus alii nodi dependebant. Nullo manifesto odore præditam esse obserua-

seruabam, sed saporem habere deprehendebam nonnihil adstringentem, & linguam exsiccantem initio, diutius vero manducatam tenuem suauemque acrimoniam in ore relinquere.

Vires quoque easdem Drakenæ suæ tribuit, quas alii Contrayeruæ, dum in sequentibus porro addit: *N. Eliot*, qui Drake in ea navigatione comitatus fuerat, ipsi retulisse, Hispanos in Peru radicem hanc in maximo pretio habere, eamque non nisi difficulter redimi posse; folia præsens esse venenum, ipsam autem radicem non modo illius veneni, sed etiam aliorum antidotum esse, & cor ac vitales facultates roborare, si pollinis in modum trita mane ex pauxillo vino sumeretur, ex aqua vero febris ardores mitigare.

Equidem *Caspar Baubinus Pinac lib. 1. sect. 2. p. 14.* diuersas radices esse existimat, Contrayeruam & Drakenam, dum illam vocat Cyperum longum odorum Peruanum, hanc vero Cyperum longum inodorum Peruanum. Eandem quoque opinionem fouet *Pometus histoire de Drogues, pag. 48.* cum Contrayeruam descripsisset, subiungit: Il croit encore au Perou une racine fort semblable à celle cy-dessus, qui est appellee Drak, ou Drakena, du nom de François Drak, qui en a apporté le premier en Angletterre.

Ast cum neque *Baubinus*, neque *Pometus* indicet, quæ in re a se inuicem differant, descriptio vero Clusii adeo exacte cum nostra Contrayerua conueniat, merito cum *Wormio in Museo p. 154. Raio hist. plant. p. 1339. Morisone hist. plant. parte tertia p. 240.* & aliis statuimus, Drakenam Clusii & Contrayeruam officinarum easdem esse radices. Quæcunque enim figura externa, & forma interna, seu viribus, inter se conueniunt, illa merito pro iisdem habenda. Agnouere, idem Angli communi consensu in Pharmacopœia Londi-

nen-

nensi in vna serie radicem contrayeruæ, Drakenæ, tanquam synonyma recensentes.

Nec prætereundum est hoc loco, ipsum *Clusium* distinguere Drakenam suam a Contrayerua Monardi, quam supra pro Contrayerua officinarum descripsimus, dum *cit. loco* facultatum ratione valde conuenire Drakenam cum radicibus veneno aduersantibus Monardi inquit, ast desiderare se aromaticum saporem, & caloris gradum, quem illis radicibus tribuit.

Ast si descriptionem Monardi cum Drakena Clusii, siue Contrayerua officinarum, conferamus, facile hæc inter se conciliari posse videntur. Et quidem calorem quod attinet, *Monardus* Contrayeruam suam calidam esse secundo gradu scribit, ad hunc gradum etiam Drakenam Clusii, nemine contradicente, referendam esse vel exinde patet, quia est acris. Refert enim *Baubin* *hist. plant. tom. 2. lib. 19.* se molestam fensisse acredinem, in radicibus Drakenis, quas *Cherlerus 1606.* ex Anglia attulerat. Ipse *Clusius* quoque iisdem acrimoniam tribuit, quamuis debilem esse scribat; cum vero acris, vel saltem acriuscula, ad secundum caloris gradum pertineant, merito etiam Drakena eodem referenda est, adeoque ratione caloris non differt a Contrayerua Monardi.

Quod vero aromaticum saporem attinet, nec ille penitus denegari potest Drakenæ; gaudet enim, vel solo gustu teste, particulis calefacientibus, siccantibus, stimulantibus, volatilibus, balsamicis, quæ aromaticorum naturam constituunt, quamuis non in tanta copia in hac, vti in aliis radicibus aromaticis, adsint, & ob particularum terrearum & acidarum prædominium se non exferere æque possint. Hinc etiam *Monardus* aromaticum quiddam sapere inquit, quo ipso omnino minorem saporis aromatici gradum inuenire,

videtur. Adeoque hisce rite perpensis, non dubitamus asserere contrayeruam *Monardi* & *Drakenam Clusii*, seu contrayeruam officinarum eandem esse radicem.

Hisce tanquam fontibus delibatis etiam reliqua synonyma memoranda sunt. Sic quod Græcis est *antidotus*, idem vel vi vocis est contrayerua; idem in Latio si reddendum sit, seu Latinis est *Contra venenum*, iuxta *Muntingium*, vtitur autem contrayerua, Latinitate donato vocabulo Hispanico, radix alexipharmaca, radix yerua. *Tabernamontano* radix Bezoardica, Gallis racine de Yerua, Germanis autem *Giffiwurtzel* audit, quæ nomina singula quoad significationem eadem sunt, nec nisi pro linguarum idiomate variant. A figura foliorum & modo crescendi totius plantæ *Muntingio* audit ferrum equinum volubile, quia folia eius ferro, quo calceantur equi, similia sunt. *Paulo Hermann* clematis Passionalis Peruviana folio bifido, ob similitudinem florum cum floribus passionis.

Americani, teste *Franc. Hernandez*, qui primus plantam ipsam descripsit, eiusque iconem simul exhibet in *thesauro rerum Med. Nova Hisp. p. 301.* eam vocant Coanenepilli, alii Yztac Coanenepilli, alii Coapatli, Coatli Xochitlanensem. Barbara equidem sunt hæc nomina, nec explicatu facile, quid denotent, attamen si in re incerta coniecturæ locus est, si non omnia, saltem quædam idem denotabunt, quod Hispanis contrayerua: patli enim, teste modo citato. *Fr. Hernandez*, Medicinam notat, adeo ut Coapatli idem forsitan significet, ac venenorum medicina, quoniam præcipua radicis virtus in eo consistit, ut venenis resistat, Indisque solenne a virtutibus plantas denominare.

Sed cum hoc loco autores, qui de Contrayerua scripserunt, in duas partes abeant, dum alii Coanenepilli *Fr. Her-*

*h*ernandez cum contrayerua vnam & eandem esse plantam asserunt, alii diuersas esse existimant, operæ pretium videtur hæc penitus inquirere. Pro iisdem agnoscunt *Terentius in commentario in Fr. Hernandez, Simon Pauli in quadripart. Bot. p. 45. Paulus Hermannus in Cynosura Mat. Med. Emanuel König, in regno vegetabili p. m. 805. Valentin. in Museo & alii plures.* Diuersas vero plantas esse existimant *Olaus Wormius in Museo p. 154. & qui eius verba repetit Fr. Hoffmannus in clau. Schröd. p. 450.* quibus etiam annumerari meretur *Raius in hist. plantarum, dum como I. p. 651.* Coanenepilli Hernandez ad Granadillas refert, contrayeruam autem officinarum sub anomalis recenset.

Hæc vt clarius pateant, breuibus descriptionem *Fr. Hernandez* addemus: *Coanenepilli inquit c. l. p. 301.* herba est folia ferens lunæ crescentis in modum, aut solearum, quibus calceantur iumenta, signata quoque clauis luteo colore, caules volubiles, teretes, exiles ac ornatos per interualla præ narratis foliis, item capreolos & flores multicolores *Veronica* fere forma, sed longe minores, radicem vero prolixam & conuolutam, minimum digitum crassam, fibratamque, cuius est vsus in medicina.

Radici hæc descriptio dubium mouet *Wormio* atque *Hoffmanno*, vt existiment, non posse eandem cum nostra contrayerua conciliari. Ast si hanc descriptionem *Coanenepilli Fr. Hernandez* cum descriptione *Drakenæ Clusii*, quam tamen vterque pro vera Contrayerua agnoscit, conferamus, parum a se inuicem differre videntur.

Prolixa esse dicitur *Fr. Hernandez, Clusio* autem prælonga, adeoque diuersis quidem vocabulis, sed idem significantibus, longitudinem radici definiunt. Equidem hæc descriptio non conuenire videtur cum Contrayerua officina-

rum, utpote quæ non prælonga vel proluxa est, cuius ratio hæc esse videtur: cum, teste *Clusio*, radix fibras habeat crassiusculas, & maiusculas, duras & lentas, e quibus alii nodi dependent, hoc respectu prælonga dici potest. Ast fibræ hæ ab Hispanis in India præcidi videntur, adeoque radix unica in plures partes diuidi, quo scilicet arctius in se coeant, nec, cum in tam longe disiunctas regiones transferantur, magnum affectent spatium, imprimis cum fibræ istæ ob tenacitatem, non facile in puluerem redigi adeoque in usum cedere possint. Hinc videmus in plurimis radicibus vestigia harum fibrarum præcisarum adhuc superesse, rarissime autem ex hisce fibris dependere alias radices; adeoque, cum *Fr. Hernandez* plantam ipsam in loco natali viderit, radicem quoque, uti in India effoditur, descripsit.

Quid vero in descriptione per radicem conuolutam intelligat, non æque liquet, nisi illud de nodis, qui a fibris crassis dependere dicuntur *Clusio*, intelligendum esse dicamus. Reliqua autem descriptionis verba æque cum *Clusii* descriptione ac ipsa radice contrayerua optime quadrant, fibratam enim esse radicem *Clusius* quoque asserit, & ipsa radicis inspectio confirmat. Nec in crassitie radicis determinanda differunt dicti autores, crassities enim semiuncialis & minimi digiti parum vel nihil a se discrepant. Huc accedit, eandem radicem pro ætatis diuersitate crassiorem vel tenuiorem esse. Adeoque cum vires eadem tribuantur Coanenepilli, quæ nostræ Contrayeruæ competunt, descriptio radicis non obstat, quo minus pro iisdem agnoscamus.

Optime autem dubium hoc dirimit *Muntingius*, qui ex semine Contrayeruæ, quod ex America accepit, plantam obtinuit, & in horto suo coluit, figura foliorum, modo crescendo, & floribus Coanenepilli simillimam, uti videre est in eius *Phytographia curiosa* p. 713.

DEFINIRI potest Contrayerva, quod sit radix oblonga, nodosa, fibrosa, foris ruffa, intus pallida, saporis adstringentis & acriusculi, viribus bezoardicis præcipue, hinc & aliis conspicua.

GENVS est radix, ab hac enim hoc loco tanquam potiori parte plantæ sit denominatio, eaque exotica, in Europa enim non nisi rarissime, vel ex semine, ex India allato & ad germinationem artificiose præparato, crescit, vel per radicem terræ commissam propagatur, de quo viroque, propagandi modo videri potest *Muntingius l. c.*

Qui vero eandem sibi comparare gestiunt, probe prospiciant, ne vetustam, carie & vermibus exesam, quod ex foraminulis, quibus tunc pertusa est, primo statim intuitu apparet, accipiant. Laudatur enim, ubi electioni locus datur, radix recens, ponderosa, dura, solida, fibris instructa, nodosa, colore intus ex albo gryseo, extus obscure rubro prædita, saporis initio paululum adstringentis, si vero diutius manducatur, leniter acris. Ipsa vero planta, quæ ex hac radice provenit, diu latuit incognita, donec *Franc. Hernandez* sub nomine Coanenepilli, uti supra diximus, & post ipsum *Muntingius* eam descripserunt.

Caulis habet teretes, volubiles, quibus vicinas arbores vel frutices apprehendit, sicque in altum procrescit. *Folia* habet viridia, in inferna autem parte paulo pallidiora, latitudo eorum digitum latum æquat, longitudo paululum superat. In medio exsculpta quasi sunt, æque lunam crescentem, vel ferrum, quibus calceantur equi, repræsentant; percurrunt quoque hæc folia plures venæ nigricantes, notata item sunt maculis luteis, eo loco, quo clavi ferris istis equinis infigi solent, insidentque breuibus petiolis.

Flores profert rotundos, variegatos, polypetalos, qui


mox decidunt, nec in nostris terris fructum proferunt, in India vero flores sequuntur, iuxta *Hernandez*, baccae, quæ ex castaneo ad nigrum tendente pinguntur colore, semen continentes rotundum & nigricans.

Latius & fusius hæc descripta videri possunt apud citatos autores; sufficiat nobis hæc hoc loco saltem breuiter & ὡς ἐν παρρησίᾳ notasse, quantum nostri est scopi.

CAPVT II.

De

Loco Natali, Differentia & Genere Contrayeruæ.

ocus natalis Contrayeruæ a variis autoribus non vnus assignatur. Generatim equidem omnes in eo conueniunt, quod ex India occidentali ad nos deferatur, in speciali autem regione determinanda a se inuicem discrepant. Ex Peruuia apportari *Monardus simpl. med. hist. p. 311. Clusius Exot. lib. IV. c. 8. Wormius in Museo p. 154. Ettmüller. in operibus p. 430. Samuel Dale p. 233. & ex recentioribus tantum non omnes affirmant.*

Hæc vero regio, vt e Geographicis notum, in America Meridionali ad mare pacificum sita, florentissima, atque, post Mexicanum regnum, potentissima totius Americæ, ab Hispanis 1529. inuenta, non tantum ob ditissimas aurifodinas, sed & copiosissimum prouentum plantarum varii generis, medicamentosa qualitate salutarium, celebris est. Vnicum exempli loco sit balsamum Peruuianum, ab hac prouincia cognominatum, vsibus chirurgicis atque medicis celebra-

bratissimum, vt gummi de Peru, & alia taceamus. *Monardus* specialissime ex Charcarum præfectura, in hac prouincia sita, afferri scribit, *Ferrus* autem, referente *Morifone in bist. plant. Oxon. parte 3. p. 240.* in Tonsaglia sponte nasci tradit.

Quamuis vero, plurimorum medicorum consensu, præcipue in Perua proueniat; non improbabile tamen est, eam etiam in aliis prouinciis Americanis, siue sponte, siue arte, eo promotam, crescere, vti sane *Pometus* ex Noua Hispania afferri, *Nardus Ant. Recchus* autem multis in locis agri Mexicani, præcipue autem Xochitlani, vbi eius vires primo exploratae sunt, nasci scribit.

Hæc vti optime simul stare possunt, nec sibi inuicem opposita sunt: ita nullum tamen est dubium, quin maxima eius copia ab Hispanis ex Perua aduehatur, vnde postea per Hollandiam in Germaniam aliasque regiones defertur.

Visis hæctenus Contrayeruæ nomine, origine atque loco natali, differentia eius in sui considerationem nos rapiunt; multum enim interest, hanc in materiae medicæ selectu probe nosse, ne quid pro quo, falsum pro vero accipiamus, & simplicia eodem nomine gaudentia pro iisdem habeamus.

Equidem non opus videtur, hac de re verba facere, cum omnes, quotquot videre contigit, autores, qui de Contrayerua scripsere, non nisi vnicam eius speciem describant, ac in officinis quoque vnica tantum radix sub hoc nomine vendatur. Attamen, cum passim idem nomen aliis quoque tribuatur radicibus, illas hoc loco memorare consultum est.

Sic a nonnullis idem nomen tribuitur Serpentinae Virginianæ, dum illam Contrayeruam Virginianam vocant. Quamuis vero radices hæ, Serpentina atque Contrayerua, quoad externam faciem nullam inter se conuenientiam habeant,

beant, si solas fibras excipias; hæc enim, nempe Contrayerua, fibroso-tuberosa, atque nodosa est, illa mere fibrosa, sapore quoque amaricante, acri, odore magis aromatico a Contrayerua longe differt, ut planta ipsa quoque Serpentaria, cum ad Aristolochias pertineat, foliis, modo crescendi, atque floribus, a Contrayerua nostra diversissima est; conveniunt tamen patria, utraque enim ex America oritur, & viribus, utraque bezoardica virtute insigni pollet, ut adeo hoc respectu utraque Contrayeruæ nomen gerere possit, modo non inter se confundantur.

Secundo loco memoranda est Contrayerua Germanica, quod nomen, ut apud *Scbröderum*, *Hoffmannum* in *clauæ Scbröd. & Francum* in *lexico plant.* videre est, tribuitur anthoræ, siue rectius antithoræ dictæ, quasi *αντιθώρα*, quod nempe thoræ, siue phthoræ, quod idem notat ac corruptio, venenum, antidotum sit. Referunt enim *Matthiolus* atque *Tabernaemontanus*, adeo exitiale esse venenum thoræ, ut etiam optima theriaca illi resistere non valeat, solam vero hanc radicem, in pulvere ad drachmam vnā sumtam, illud per vomitum, vel per aluum atque urinam expellere, vnde etiam Germanis *Giff-Heyl*, *Heyl-Giff* audit.

Crescit hæc radix maxime in Rhæticis, Sabaudicis atque Helueticis montibus. Facile autem a Contrayerua vera distingui potest, radix enim eius ex bulbis oliuaribus constat, oblongorum testiculorum more protuberantibus; paucioribus quoque fibris gaudet, quam vera Contrayerua, a qua etiam gustu facile discernitur, cum intense amara sit. Folia eius napelli sunt æmula, id saltem habent differentia, quod tenuius dissecta, nec adeo splendentia sint, flores cucullati a Napello non nisi colore, ex flauo pallidente, differunt.

Quam.

Quamuis vero, respectu plantæ ipsius, diuersissima esse a Contrayerua, adeoque inepte Contrayerua Germanica dici videatur, id tamen, si vires eius respicias, adeo absonum non est, easdem enim cum Contrayerua ipsi tribuunt facultates, resistendi venenis, non modo herbæ venenosæ thoræ, sed & alia venena hausta expellendi, in febribus item petechialibus & aliis malignis, vt & ad morsus atque ictus venenatos, maximopere commendant. In ipsa peste quoque *Antonius Guainerius* illam summo cum effectū adhiberi scribit, adeoque cum ratione virium tanta sit similitudo, cur non in nomine quoque analogia locum inueniat?

Nec reticenda est tertia, *Contrayerua alba*, de qua videri potest *Pometus, bistoire de Drogues p. 48.* vbi quosdam vincetoxicum Contrayeruam albam vocare scribit, quod existiment, eandem cum illa virtutem possidere. Facile vero est, hanc a nostra Contrayerua distinguere, cum radices habeat tenues fibrosas, albas, viribus equidem bezoardicis præditas, longe tamen Contrayerua vera inferiores.

Nil hic amplius monendum videtur, circa differentias, nisi quod inter radices Contrayeruæ veræ nonnunquam inueniantur paulo reliquis maiores, cæque velut nodosæ magis. Deinde inter rariora cimelia Wedeliana extat minor paulo species, sub titulo radices Contrayeruæ, e Calabria olim, ante quamplures iam annos, ex Italia missa, de qua tamen plura afferre non licet, quandoquidem altum de ea vbiuis, quantum nobis succurrit, est silentium, vnde illud saltem verbo attingere placuit.

Cum hætenus Contrayeruæ differentias, quantum innotuit, recensuerimus, proximum iam est, vt & genus, ad quod in ordine Botanico referri possit, disquiramus, lustran-

do plantam secundum characterem suum, crescendi modum, & alia huc spectantia,

Equidem id prima fronte difficile videtur, ob defectum inspectionis ocularis, & incompletam descriptionem illarum partium plantæ, quæ ad genus constituendum requiruntur; id tamen omnibus rite perpensis impossibile non erit.

Qui primitus eandem descripsit *Monardus*, ad *Irides* referre videtur, dum in *simpl. med. histor. p. 311.* Iridis radicibus similes esse scribit, nisi quod minores, cui etiam assentitur *Olaus Wormius in Museo p. 154.* dum allegatis Monardi verbis addit, eo certe convenire videtur *Contrayerua*, quod grumosa existat, supra terram repens, & fibras multas de se spargens, quæ a summo ad imum graciles evadunt.

Ast, ut taceamus characterem plantarum non a radicibus, sed florum atque fructuum similitudine hodie constitui, a radicibus vero tantum differentias specierum eiusdem generis peti, ipsæ quoque radices *Contrayeruæ* cum iridis radicibus parum convenire videntur, non enim iridis radices nodosæ sunt, nec fibris adeo copiosis & longis instructæ, superficies quoque earum lævis est, non rugosa atque inæqualis, ut *Contrayerua*. Nec similitudo quædam in foliis atque floribus, qui toto cælo a se inuicem discrepant, occurrit, adeoque ad eandem classem, in ordine Botanico, referri non possunt.

Nec maiori iure *Cyperis* annumerari potest, secundum *Casp. Bauhinum*, (cui *Cyperus longus Peruanus* audit,) & *Morisonum*, qui in *hist. plant. Oxon. parte 3. p. 240.* *Cyperis* consonantes esse scribit radices *Contrayeruæ*. Factum id esse videtur, ob qualemcunque similitudinem radicibus, quæ tamen adeo exacta non est; desunt enim *Cyperis* longi radicibus fibræ, quibus abundat *Contrayerua*, nec crassitie eandem

dem æquant, nec rugositas atque extuberantia nodosa deprehenditur in Cypero.

Quod si vero plantam ipsam spectemus, maior longe erit differentia. Est enim Cyperus planta graminifolia, caule enodi, triquetro, flore apetalò, siue stamineo: Contrayerua vero folia habet ferro equino similia, caules volubiles, teretes, flores autem polypetalos, adeoque, cum nulla pars plantæ Cyperis similis sit, iisdem etiam annumerari nequit.

Si *Iob. Bauhinum* sequi velimus, ad *plantagines* referenda erit. *Tomo enim tertio hist. plant. lib. 31. cap. 1. p. 507.* cum varias plantaginis species descripsisset, plantam quandam annectit, quam vocat plantagini simile antipharmacum, siue Contrayerua, eamque describit, quod sit planta foliis latis, plantagini Hispanicæ haud absimilibus, quæ trita & vulneribus imposita aduersetur pernicioso cuidam toxico, quo in bello & venationibus vtantur Indi, adeo vt Hispani pro magno thesauro existiment, eam plantam se inuenisse.

Dictam hanc plantaginis speciem eandem esse existimat cum radicibus, quas *Monardus lib. simpl. medicamentorum ex nouo orbe delatorum c. 17.* delineauit, quasque, superius descriptas, nostram Contrayeruam esse diximus.

Quamuis vero hæc, a *Baubino* descripta, plantaginis species, viribus venenis aduersis conspicua sit, vt nostra quoque; non tamen inde concludere licet, esse eandem cum Contrayerua, cum plures dentur plantæ, in India, quæ venenis resistunt. Ponamus enim, radicem plantaginis habere quandam conuenientiam cum Contrayerua, vti sane symbolismus quidam apparet ad oculum, seu fibras, seu vires spectemus, attamen simile non esse idem etiam h. l. verum est.

Benignissima sane natura vt multa venena, non solum

ex vegetabili, sed & animali regno in illis regionibus producit, quod exemplo tot serpentum venenatorum, quorum morsus sæpe adeo funestus est, vt intra paucas horas perimar, clarum est; ita etiam vicissim de magna copia antidotorum ipsis prospexit, quibus sese contra atrociam horum venenorum conseruare possint; adeo vt a virtute pluribus plantis communi, ad identitatem generis vel speciei, concludere non liceat.

Quod vero Contrayerua nostra non possit esse dicta plantaginis species *Barbini*, vel ex eo maxime euincitur, quod non herba, sed radix eius in vsu sit, eaque non exterius, sed tantum interius adhibita; imo, teste *Clusio*, folia potius præsentissimum venenum sunt, quam aliorum antidotum.

Secundum mentem *Simonis Paulli* ad *Caryophyllatas* referenda esset Contrayerua, ita enim ille in *quadripart. Bot. class. secunda p. m. 45.* inquit: vt libere hic loci mentem meam explicem, perfacile me in eam sententiam adductum iri profiteor, vt, cum *Caryophyllatam* practitorum nonnulli alexipharmacis annumerent, statuam, radicem exotam, ab Hispanis, Indias inhabitantibus, Contrayeruam, *Clusio* Drakenam radicem nominatam, non aliam esse quam *Caryophyllatæ* alicuius radicem.

Respexit hoc loco autor citatus itidem solam qualemcunque analogiam radicum, plantæ interim ipsæ differunt toto cœlo. Non enim sarmentaria est *Caryophyllata*, caulesque volubiles habet, vt *Contrayerua*, sed folia habet pinata, flores pentapetalos, discum cingentes, quibus succedunt globuli hirsuti, in quibus plurima semina, arcte in globum coacta, relinquunt filamenta rigida, crinita aut papposa, iuxta *Ammannum*, quæ omnia a *Contrayeruæ* floribus atque fructibus

tribus diuersissima sunt, adeoque cum Caryophyllata ad idem genus referri nequit.

Nec illis assentiri possumus, qui ad *Anthoram* referunt; analogia enim virium, quam maxime pro fundamento habent, non infert identitatem generis, herbam ipsam enim anthoræ ad napellum pertinere, iam supra innuimus, cum quo Contrayerua ne minimam quidem conuenientiam habet.

Proximus ad naturam plantæ accedit genus a *Fr. Hernandez bist. rerum Med. nou. Hisp. p. 302.* assignatum. Ibidem enim inter *Bryonia* species, quæ ex bacciferarum familia est, reponi posse scribit. Equidem si modum crescendi plantæ, capreolos & caules volubiles respiciamus, parum a se inuicem discrepant, nisi quod caules Contrayeruæ teneriores sint; at flore non conueniunt, is enim in bryonia est monopetalos, campaniformis, patens, & multifidus, pluresque communi petiolo insident, quos deinde baccæ sequuntur globosæ; Contrayerua autem florem habet polypetalum, nec plures flores eidem petiolo insident, sed vnicus tantum, quem sequitur fructus vnicus, adeoque cum quoad partes plantæ nobiliores a se inuicem discrepent, ad idem genus, & sub hoc contentam speciem referri nequeunt.

Visis hætenus variis autorum opinionibus, circa genus & characterem Contrayeruæ, nostrum iam est, vt dicamus, quo tandem referri debeat.

Cumque in constituendo genere primario respiciantur flores & fructus, secundario etiam folia, radices, aliæque partes, illorum respectu non videtur aptius & magis genuinum inueniri posse genus, quam pomiferarum, iuxta *Morisonum*, & in specie sub hoc contentarum *Clematidum passionarium*, cum his enim, si non quoad omnia, potiora tamen symbolismi momenta, conuenit.

Et quidem florem, primarium atque gratisimum plantæ decus, quod attinet, is in floribus passionis, iuxta *Hermannum* in *Flor. Lugd. Batav. Flo. p. 262.* est polypetalos, vel ex quinque, vel decem petalis, ad ungues iunctis, duplici radiata corona, quinque staminibus apiculatis &c. constans. Id ipsum etiam de *Contrayerua* tradit *Muntingius*, quod habeat florem rotundum, multis albis petalis instructum, quod etiam ex figura, apud *Nardum Ant. Recchum* depicta, conspici licet, nec stamina apiculata in flore *Contrayeruæ* desunt, quæ *Paulus Hermannus c. l.* inter partes characterem *Clematidis* passionalis constituentes recenset.

Numerum quidem horum staminum, quem *Hermannus* ad quinarium refert, non definit *Muntingius*, sed tantum aliquot fibras in medio procreescere scribit, quo ipso tamen non contradicit, sed sub indefinito numero, definitum comprehendit. Nec radiata corona duplex, quam supra citatus *Hermannus* flori passionis tribuit, deesse videtur, quod ex *Muntingio* haud obscure colligere licet, dum florem, in exteriori circumferentia, multa alba petala habere scribit, interiori autem variis coloribus pictum esse.

Quamvis enim fibrarum istarum, quæ in floribus passionis duplicem radiatam coronam constituunt, nullam mentionem faciat, dum ut in aliis plantis, ita & in hac, florem quoad omnes partes adeo exacte non describit; cum tamen in illis floribus passionis, qui flore albo hortos curiosorum ornant, petala prorsus alba, nec villo alio colore tincta sint, variegatus autem color floris, a fibris illis, quæ duplicem radiatam coronam constituunt, & variis iisque elegantissimis coloribus præditæ sunt, vix debeat, idem & in *Contrayeruæ* flore fieri, *Muntingiumque*, dum petala alba esse, medietatem autem floris variis coloribus gaudere scribit,

hoc

hoc ipso fibras variegatas intelligere non inepte coniectare licet.

Nec fructus plantarum finis ultimus, qui vna cum floribus omne absoluunt punctum, in definiendo genere atque charactere, abluunt; siquidem, verbis *Fr. Hernandez* florem sequuntur baccae, quae ex castaneo ad nigrum tendente pinguntur colore. Equidem hoc loco diuersitas quaedam esse videtur, inter fructum Contrayeruae atque Granadillae, siquidem huic tribuuntur a *Raio* in *historia plant.* poma, vnde etiam ab eodem ad pomiferarum genus referuntur: Contrayeruae autem fructus, non poma, sed baccae vocantur a *Fr. Hernandez*. At hoc non obstat, quo minus sub eodem genere simul stare possint.

Poma enim & baccae, iuxta *Raium*, non differunt, nisi magnitudine & cortice, quem poma crassum, baccae autem membranaceum habent; differentiam autem hanc non attendisse videtur *Fr. Hernandez*, sed cum fructus non adeo magni sint, promiscue baccas pro pomis vocasse, quod etiam alii Botanici celebres fecere. Siquidem *Ammanus* in *charact. plant. p. m. 86.* vbi Clematidum differentias recenset, flores passionis ad Clematides bacciferas pertinere scribit, cum tamen, iuxta *Raium*, pomiferae sint, ipse quoque *F. Columna* in *commentario in Fr. Hernandez. p. 888.* propria auctoritate edoctus, illis poma tribuat, quae quoniam fructui mali Punici similia sunt, plantae nomen granadillae dederunt.

Adeoque cum, ut ex dictis patet, baccae non semper fructus pomis contradistinctos notent, sed saepe vnum pro altero indifferenter ponatur, liceat nobis idem de Contrayeruae fructu affirmare, inprimis cum non uti in plerisque bacciferis, quae in tantam altitudinem excrescunt ut Contrayerua, plures flores & consequenter etiam fructus
eidem

eidem petiolo insideant, vt in Bryonia, solano scandente &c. videre licet, sed flos atque fructus vnicus, quod pomiferis magis solenne.

Quod si vel maxime fructus Contrayeruæ baccæ essent, non poma, id tamen non obstarer, quo minus ad flores passionis posset referri, siquidem id etiam in aliis plantis solenne est, vt quædam eiusdem speciei baccas, quædam poma ferant. Exempli loco sint solana, quorum quædam baccas ferunt, v. g. solanum scandens, siue dulcamara, quædam poma, vt solanum arborescens pomiferum, item poma amoris.


Hæc omnia satis euincunt, Contrayeruam, quoad potiores partes plantæ, florem nempe & fructum, cum floribus passionis ad eandem classem referri debere. Hinc etiam *Raius in hist. plantarum tom. 1. p. 651.* Coanenepilli seu Contrayeruam *Hernandez*, & ferrum equinum volubile *Muntingii*, cum floribus passionis eodem capite recenset, flori-que passionis affinem vocat.

Quod si vero reliquas partes plantæ inter se comparemus, & in illis aliquam similitudinem deprehendere licebit: folia quidem peculiari gaudent figura, ab aliis plantis plane diuersa, adeoque nec cum granadilla conueniunt; ast modus crescendi plantæ, qui talis est, vt vicinis rebus suffulta, in altum excrescat, vna cum capreolis & caulibus, in vtraque planta simillimus est, atque sic analogiam harum plantarum adhuc magis confirmat.

CAPVT III.

De

Contrayeruæ Temperamento, viribus & usu.

 T quæuis vniuersi huius corpora mixta, ex diuersis, ratione figuræ, magnitudinis & motus particulis constructa sunt; ita quoque Contrayerua constat particulis non homogeneis, sed variis, ratione magnitudinis, situs & figuræ, volatilibus, fixis, atque mediis, ex quibus certa proportionem inter se commixtis, virtus eiusdem seminalis, specifica, atque temperamentum dependet.

In hoc examinando, si media cognoscendi impendere velimus, potissimum argumentum desumendum erit ex sapore. Is cum subacris sit atque incidens, satis iam, a priori, de particularum actiuorum, tum salinarum, volatilium, fixarum, tum sulphurearum eminentium prædominio aliquo testatur, adeoque calidam & siccam esse radicem, gradu secundo, non difficulter elucet.

Equidem primo intuitu penitus particulis actiuis destituta videtur, dum sapor nihil nisi terreas offert, vnde etiam ab *Hermanno in Lapide Lydio Mat. Med. p. 16.* ad radices, quæ particulis acidis & copiosis terreis constant, refertur; ast acrimonia illa tenuis, quæ non, nisi diutius manducando radicem, sese exeret, actiuiores latere innuit. Hæ enim cum sub reliquarum inuolucro lateant, non nisi a liquore saliuiali solutæ papillulas linguæ afficere possunt, salinæ præcipue, sulphureæ autem longe melius in aprium

prodeunt, quando mediante spiritu vini, in paranda Tinctura, a vinculis atque compedibus suis liberatæ, cum menstruo sese uniunt.

Dicta hætenus adhuc magis confirmat analysis Chimica. Volatiles enim particulas Contrayeruæ inesse, odor penetrantissimus, qui in destillatione nares ferit, satis manifeste euincit; nec salinæ variæ figuræ desunt, præter spiritum acidum enim, sal alcali quoque inde elicitur. Complementum addunt particulæ sulphuræ, inflammabiles, resinosa, quas ex Tinctura cum aqua confusa lactescente conspiciere licet, quæ caliditatem adhuc magis confirmant, omnia enim resinosa calida sunt.

Ex dictis hætenus elementis Contrayeruæ facile est eius deducere vires. Cum enim, ut superius diximus, calida sit & sicca, particulis suis sulphureis, motum celeriores sanguini reddendo, & sulphur eius augendo, calefacit & siccatur; particulis salinis aperit, incidit, attenuat, terreis autem, cum acidis iunctis, tonum partium roborat, atque leniter adstringit.

Emeticas eidem vires tribuere videtur *Rolfincius in O. & M. C. p. 870.* ubi ad 38. sumtam, per vomitum vel sudorem agere scribit. Alii quoque autores, venena hausta per vomitum eius usu euacuari asserunt; ast id fit magis per accidens, & naturæ actuantis robore, quam directe a medicamenti actione. Vti enim natura sæpius proprio conatu heterogeneous in ventriculo contentum per vomitum eiicere tentat: ita Contrayerua conatus eius promouendo indirecte hunc effectum præstare potest, non minus ac pulveres absorbentes ac bezoardici, in dispositis, quandoque vomitum movent. Nisi vero iam dum aliquid ventriculum ad vomitum concitans adsit, hoc pacto velut adiuto eodem, nunquam ab eius usu vomitio sequetur.

Nota-

Notabiles sunt eius vires *diaphoretica*, calorem enim & motum sanguinis intendendo sudorem mouet, & cum eodem omne heterogeneous sanguini admixtum per poros cutis expellit.

Nec minus etiam inter *diuretica* militat, horum enim actio cum diaphoreticis sororitur, & ex iisdem principiis fluit. Commendatur hoc nomine a *Muntingio*, quod urinam & per eandem sabulum expellat.

Præcipue autem viribus *bezoardicis* omnibus aliis remediis contra excellit, vnde contra omnia venena, e quibus solum Mercurium sublimatum eximit *Monardus* atque *Wormius*, vt & ad philtrea hausta commendatur, quæ vel per vomitum, vel sudorem expellere aiunt.

Hyperbolicum videtur esse hoc assertum, cum nullum hactenus remedium cognitum sit, quod omnibus resistere valeat venenis. Varia enim dantur venena, quæ diuerso modo corpori noxam inferunt, ideoque etiam diuersa requiruntur remedia, ex triplici regno, actioni illorum contraria. Adeoque mercurio sublimato merito reliqua quoque venena ex minerali regno accensentur, quorum corrosiuitati tollendæ impar esse videtur, nisi quandoque, conatus naturæ promouendo, citameorum reiectionem per vomitum promoueat, & sic ægrum ab internectione liberet, saltim generali paulo indicatione; id tamen semper sperare non licet.

In reliquis autem venenis subigendis, si non omnibus, tamen plerisque, inprimis vero animalium, fermentatiuis illis, excellens est remedium. Sic a *Nardo Anton. Reccho* in moribus atque ictibus venenatis, araneorum, viperarum, serpentum & aliorum animalium venenatorum, tantarum esse virium traditur, vt illis citius, quam omnia alia remedia, succurrat.

Vegetabilibus quoque venenis potenter resistere vel illud argumento fuerit, quod *Clusius* refert, loco *supra citato*, illam non solum foliorum suorum, quæ præsens venenum sunt, sed & aliorum antidotum esse.

Hinc & contra venena in corpore genita, vel per contagium cum eodem communicata, morbos puta malignos, contagiosos, pestem, variolas, morbillos, aliosque consimiles valde commendatur, atque ab omnibus fere Practicis horum temporum adhibetur summo cum successu, seu per se, seu cum aliis bezoardicis. Et hoc nomine cum serpentaria Virginiana, aliisque fixioribus terreis, vel salibus quoque volatilibus, pro indicationum & urgentiæ modulo, consulto miscetur.

Videri hanc in rem meretur elegans observatio *Willisii tract. de febr. p. 138.* ubi refert, iuvenem, febre continua laborantem, die nono tendinum in carpis contractione, aliarumque partium motibus convulsivis tentatum esse, ut pene de vita eius actum esse visum fuerit. Post adhibitam autem dosin spiritus C. C. & postea singulis sex horis radicis Contrayeruæ, febrem & affectiones nervosi generis brevi cessasse, ægrumque optime restitutum fuisse.

In febribus malignis etiam sola, in substantia adhibita, mira sæpe præstitit. Iuuenis quidam, febre laborans continua maligna, symptomatum gravitate ad extrema perductus, ut nulla spes recuperandæ salutis superesset, propinato ʒj. pulveris radicis contrayeruæ, insignem alterationem in toto sensit corpore, cum momentaneo leuamine, & febris plenaria cessatione. Eundem effectum in alio ad ʒß. adhibita præstitit.

Ad præservandum quoque, in peste & aliis morbis epidemicis, dysenteria, febribus malignis & similibus, tum in
 infu.

infuso cum vino, tum in substantia, laudatissima est, unde etiam in puluerem præseruatium Wedelianum, & bezoardicum maiorem, cum aliis bezoardicis recipitur merito.

In symptomatibus quoque vrgentibus febrium, effectum non infelici, exhibetur, siue hæmorrhagia medelam requirat, siue fluxus alui symptomaticus, inprimis autem in diarrhoea, variolis & morbillis symptomatice superueniente, vtramque absoluit paginam, aluum constipando, & simul materiam morbificam per sudorem expellendo. Motibus conuulsivis quoque, febribus superuenientibus, cum neruinis & antepilepticis mixta, egregie succurrit, particulas heterogeneas acres, neruosum genus stimulant, præcipitando, & per spiracula cutis expellendo.

Seorsim etiam in febribus intermittentibus, quotidianis, tertianis, quartanis, egregie se gerit, præmissis vniuersalibus, purgantibus atque vomitoriis. Commendatur hoc nomine a *Pometo bistoire des drogues p. 48.* vbi cum duplo corticis chinæ chinæ, in puluerem redactæ, adhibitam, febres quasuis accessorias curare, minimum suspendere scribit. Remisceri eidem possunt salia alcalia fixa, amara, aliaque febrifuga. Describitur talis pulvis in *pharmacop. Bat. p. m. 150.* ex Contrayeru. serpentar. Virg. gentian. sem. citr. card. ben. & aliis. Cum enim aperiens sit atque incidens, fermentum febrile præcipitando, resoluendo, & tanquam diaphoreticum & diureticum, per poros cutis, aliaque excernicula corporis euacuando, morbum tollere apta nata est, modo vsus eius continuetur.

Quod si plus vltra progrediamur, eiusque vsum in affectibus corporis particularibus lustremus, nulla fere regio deprehenditur, cui medelam deneget desideratam.

Sic affectibus capitis variis felicem iucundamque mini-

strat opem. In Melancholia atque doloribus capitis illam commendat *Nard. Ant. Recchus*. Seorsim affectibus capitis frigidis & soporosis, humores viscidos attenuando, & in motum concitando, spiritibus vero debitum vigorem restituendo, optime medetur. In Lethargo cum rad. pæon. cran. human. serpentar. Virg. & aliis cephalicis mixtam, *Willisius tract. de anima brutorum parte secunda p. 183. & p. 225.* in apoplexia præservanda, cum angel. zedoar. dictamno Cret. & aliis commendat.

Sic & in affectibus nervosi generis aliis, motibus convulsivis seu spasmodicis, ipsaque epilepsia, non inconsulto adhibetur. Videri hac de re potest modo citatus *Willisius tract. de morbis convulsivis p. 30.* ubi in ipsa epilepsia, cum aliis antepilepticis eandem præscribit, & *p. 100.* Virgini nobili, paroxysmis convulsivis periodicis, vna cum immanibus viscerum spasminis, per plures septimanas laboranti, cum aliis antepilepticis, optato cum successu propinavit. Referri etiam huc meretur supra iam memorata eius observatio, *tr. de febris p. 138.* quæ Contrayeruz vires antepilepticas & antispasmodicas luculenter probat.

In medio ventre, teste *Nardo Ant. Reccho l. c.* dolori lateris punctorio succurrit, virtute enim diaphoretica sanguinem stagnantem in motum citat, & sic inflammationem pleuræ tollit. Cordiale etiam insigne est, in anxietatibus præcordialibus, symptomate frequentissimo febrium malignarum, camphora, oleo bez. camphorato, vel salibus volatilibus admixtis, præsentissimum est remedium. Cum enim anxietates tales sanguini restagnanti, nec æque mobili, originem suam debeant, Contrayerua, dicto modo adhibita, eius circulum in ordinem redigendo, symptomati huic optime succurrere valet.

In infimo quoque ventre, variis affectibus promptissime succurrit. In doloribus ventriculi eiusque intemperie frigida, appetitu prostrato & digestionē vitiata, infusum eiusdem cum vino factum, si quotidie ad prandium bibatur, *Muntingio & Nardo Ant. Reccho* testibus, egregie se gerit, digestionem iuvat, ventriculumque confortat; particulis enim acris pituitam extergit, menstruum ventriculi acuit, eiusque calorem auget, terreis vero adstrictoriis tonum roborat.

Similiter etiam carminativa est, flatus dissipat, vnde in terminibus tum aduulorum, tum infantum, imprimis quando aluus laxior coniungitur, non inconsulto adhibetur; acrimoniam enim acidam humorum, tunicam intestinorum nerueam stimulantem, edulcat, ortasque inde spasmodicas contractiones, virtute antepileptica, mitigat.

Præterea etiam in diarrhœa & hypercatharsi sedanda idoneam obtinet virtutem, cum primis autem in dysenteria laudatissima est. In hac enim cum non tam mere adstringentia, quam potius bezoardica conueniant, Contrayerua vtramque absoluit paginam: virtute enim alexipharmaca putredini atque malignitati sæpe latenti resistit, leniter adstrictoria autem alui fluxum simul cohibet.

Confirmat id ipsum experientia *Willisi*, qui in dysenteria, 1671. Londini epidemice & atrociter sæuiente, in iuvene 25. annorum, eadem cum sedibus copiosis cruentis torminibusque correpto, inter alia electuarium ex conseru. ros. rubr. ther. Andr. puluere rad. torment. contrayeru. margarit. corall. c. sir. pap. rhœad. exhibuit, vnde altero statim die sedes copiosæ remisere, cumque idem recidiuam pareretur, Contrayerua cum bolo Armena, tormentilla, aliisque remixta, ægrum feliciter restituit. Idem quoque omnibus
fere

fere medicamentis, in dysenteria cruenta & incruenta præscriptis, eandem admiscet.

Porro in vermibus intestinorum expellendis egregiam obtinet virtutem, quo nomine a *Monardo*, *Wormio*, & aliis commendatur. Præstat id virtute cum aliis bezoardicis communi, (omnia enim bezoardica sunt anthelmintica,) ob particulas sulphureas, salinas, balsamicas, quibus calorem nativum debilem roborat, & humores corruptos putridos, tanquam nidum & pabulum vermium, corrigit.

Nec antihysterica eius virtus reticenda est: virtute enim calefaciente sanguinis motum per poros & vasa uteri promouet, eiusque intemperiem frigidam corrigit, unde in mensium fluxu deficiente vel imminuto, fluore item albo, lympham superfluam dissipando, poris vero & vasis lymphaticis pristinum tonum restituendo, conducit. Virtute item antepileptica in passionibus hystericis & motibus spasmodicis infimi ventus, variisque inde oriundis symptomatibus in toto corpore, commodam navat operam, in quo casu *Willisius* cum serpentaria Virg. corall. & succin. alb. eandem præscribit, *tract. de morb. convulsiv. p. 118.*

Extremæ quoque partes a Contrayeruæ usu solamen sibi promittere possunt. In articulorum enim doloribus, arthritide, affectu ischiadico & similibus morbis, a *Nardo Ant. Reccho* merito laudatur; virtute enim incidente, diaphoretica atque diuretica, naturæ motus in salibus morbo-
sis p. n. per sudorem atque urinam expellendis iuvat, terreis autem, & alcalicis potissimum particulis, acrimoniam lymphæ acido-biliosam corrigit atque edulcat.

Utque paucis hæc concludamus, ubicunque sanguinis motus promouendus, sudor procurandus, malignitas præcauenda, vel iam actu præsens expellenda, disiicienda & in-

uertendo.

uertenda, Contrayerua laudatissima est, vel hoc quoque nomine tanto magis commendanda, quod temperatior sit, nec calore nimio, vel volatilitate excedat, adeoque non facile noxam parere possit.

Nec est, cur quis terreatur verbis B. Ettmülleri, qui in *commentario Ludouiciano p. m. 897.* eandem minus tutam esse scribit. Cum enim dudum a celeberrimis Practicis toties, cum successu optato, adhibita sit, ipse quoque *Ettmüllerus cap. de febribus malignis p. 334.* eandem præstantissimis bezoardicis annumeret, merito illa verba non attendenda erunt.

Denique etiam laudari meretur vsus eius EXTERNVS, siquidem in sacculis ad pulsus, vna cum speciebus pro epithemate cordis, zedoaria, camphora, aliisque sæpius in morbis malignis adhibetur. Vbi inter alios vsus, id quoque præstat, quod medicum pulsum tangentem, ne a contagio maligno inficiatur, præseruet.

CAPVT IV.

De

Præparatis e Contrayerua variis, simplicibus & compositis, eorumque usu.



T variis pollet viribus Contrayerua, ita etiam variis modis exhibetur, & præparata præbet varii generis, maioris & minoris apparatus.

Optimus vero & frequentissimus eam adhibendi modus est in *substantia*, vt vocant medicorum filii, siue in pul-

E

uere.

uere. Cum enim statim sua sit, nullaue noxia qualitate gaudeat, quæ corrigente opus habeat, hinc si totus virium complexus desideratur, absque vlla præparatione, si puluerisationem excipias, commode adhibetur, siue sola, siue, quod ut plurimum fit, aliis pro diuersa medici intentione maritata.

Præscribi hinc solet, quoad dosin, in puluere a ℥ss. ad 3℥. in vehiculo idoneo: non facile vero, ut nonnullis placeat, ad 3j. ob copiam assumendi nauseosam, exhibetur. Quando enim maior medicamenti actiuitas desideratur, actiuiora alia adiungere præstat.

Si vero forma liquida vsus eius expetatur, commode *infundi* potest cum vino, obseruata tantum communi regula, quod ea quæ in substantia dantur in simplo, in infuso vel decocto recipienda sint in duplo, aut etiam triplo. Tale infusum quotidie mane, vel etiam ad prandium, adhibitum, valde commendat *Nard. Ant. Recchius*, atque *Muntingius*, non solum in præseruanda peste, sed & omnibus aliis morbis, adeo ut *Muntingius* eandem, hoc modo adhibitam, per plures annos hominem in debito vigore conseruare scribat.

Sic etiam cum aqua decoqui potest, & obtinetur hoc modo liquor flauescens, sapore amaricante atque acri ipsam radicem masticatam superans. Sola tamen rarius hoc modo in usum trahitur, frequentius autem cum aliis præscribitur, v. g. scorzon. C. C. pom. citr. fl. 4. cord. fruct. berberum &c. Pro decocto, in febribus malignis, describit tale compositum *Simon Pauli in digressionem de febribus malignis §. 7. p. 4.*

Obiter hoc loco, & tanquam in parenthesi, addendum, adhiberi tale decoctum ex scorzon. & contrayerua ad præparationem terræ sigillatæ, in compositione lapidis serpentini

ni magnetici artificialis, cuius tanta vis esse dicitur, vt mor-
sibus venenatis appositus, iis adhærescat & omne venenum
ad se trahat, cuius tamen contrarium *Fr. Rhedi*, in experi-
mentis naturalibus, in pluribus animalibus se vidisse scribit;
compositionem autem lapidis communicat *D. Valentini in*
Museo Museorum p. 508.

Cumque sic aqueo quoque pareat menstruo, non pure
resinosam esse radicem, sed gummosas quoque admixtas ha-
bere particulas claret, vnde etiam hoc modo decoquendo
in aqua, hinc lege artis colando & euaporando ad iustam
consistentiam, obtinetur EXTRACTVM nigricans, acre, amari-
cans, volatilioribus quidem particulis, quæ in decoctio-
ne in auras auolarunt, destitutum, vsibus tamen variis ad-
hibendum.

Chimicæ vero analysi subiecta, varia præbet præparata,
& inter hæc quædam in quibusdam officinis iam recepta.
Si per se, vt fecimus, retortæ indita v. g. ℔j. destilletur
ex arena, prodit primo phlegma, hinc spiritus acidus, instar
spiritus tartari, cum alcali efferuescens; colore primitus ru-
bente præditus, qui tamen postea in obscurum ex rubro
flauescentem mutatur. Denique succedit oleum crassum,
acre, inflammabile, empyreumaticum, ex capite mortuo
vero igne fortissimo calcinato, acquiritur sal alcali fixum, in-
star salis tartari, vel cinerum clauellatorum.

Ast cum hoc modo vires eius perdantur quasi, alii mo-
di merito huic anteferuntur, quibus vires eius illibatæ per-
stant. Sic si TINCTVRAM inde extrahere placeat, sequen-
tem in modum, ad mentem *Willisii, in pharmaceutica ration.*
p. 124. procedere licebit.

Rx. Contrayeru. ℔j. contusæ affunde spiritus vini rectif.
℔iij. digerantur ad extrahendam Tincturam, quæ coletur

& in balneo abstrahatur, ad consistentiam mellis. Spiritum primo abstractum serua seorsim a reliquo, reaffunde residuæ, & denuo Tincturam extrahe, cuius dosis ʒʒ. ad ʒj. Obtinetur hoc modo Tinctura viribus sui simplicis respondens, colore ex rubro flavescent, quæ aquæ affusa lactescit, adeoque partes resinosas, menstruo spirituosissimo solutas, in aprium prodit.

Quod si EXTRACTVM parare placeat, facile id eodem modo obtineri potest, v. g. ʒ. rad. Contrayeru. q. v. affunde spiritus vini rectif. q. s. digere, donec coloretur menstruum, tunc decanta, & ad exhauriendas penitus vires, novum spiritum vini affunde, & eodem modo procede, tunc Tincturas confunde, & in arena igne leni spiritum ad debitam extracti consistentiam abstrahere. Ita acquiritur extractum resinosum, iterum pro lubitu cum spiritu vini in essentiam siue Tincturam soluendum, vel ad pilulas, bolos, electuaria, aliaque medicamenta bezoardica adhibendum.

Recipitur hoc extractum in trochiscos contra pestem, & alias febres malignas Ducis Mantuani, quorum descriptio videri potest apud *Hoffmannum in thesauro pharmaceut. p. 109.* Ob præstantissimas etiam virtutes in officinis quibusdam una cum essentia inter classica medicamenta receptum est, sicut id de Vratislaviensi tradit *Francus, in Lexico plantarum*, idem vero de Lubecensi, Lipsiensi & aliis curationibus certum est.

Non inepte etiam ad aquas & spiritus bezoardicos recipi, & cum aliis bezoardicis sociari potest. Describit talem aquam bezoardicam cum vino parandam *Willisius l. c. p. 125.* Quamvis enim fixioris maximam partem naturæ sit contrayerua, adeoque centralis eius virtus hoc modo non exhauriatur, non desunt tamen volatiles particule, quæ menstruis hisce iunctæ, alem-

alembicum transcendunt. Vnde etiam extractum Contrayeruz, cum aqua factum, respectiue non adeo acre est, ac decoctum ipsum, manifesto indicio, non paucas volatiles, sulphureas, acres particulas in euaporatione vna cum aqua exhalasse, quæ si in alembico capiantur, aquam præbent non omni virtute destitutam. Longe melius id cum spiritu vini procedit, qui longe melius quam aqua particulas volatiles sulphureas secum iungere, & per alembicum vehere potest, vnde etiam ad spiritum bezoardicum & theriacalem D. Michaelis recipitur.

Sic & ad aceta bezoardica paranda, commode adhibetur. Describit tale acetum, præter alios, *Timeus Cas. Med. lib. 8. cas. 32.* illudque in peste mirifice commendat.

In Electuaria etiam antidotalia, theriacas reformatas, aliasque compositiones alexipharmacas fere omnes a recentioribus recipitur. Exempli loco sit inter alia Electuarium antidotale Oruietanum, a *Cbaras* descriptum, item theriaca coelestis reformatata a Medico Regio Gallico Doctore d' *Aquin*, descripta a *Cbaras* in *pharmacop. Regia p. 285.* item theriaca coelestis Hoffstadiana, quam tradit *Doleus* in appendice operum suorum, & quæ omnibus aliis palmam dubiam reddit, theriaca coelestis Wedeliana, cuius compositionem in peculiari dissertatione de theriaca coelesti communicatam legere est.

Idem etiam de TINCTVRIS BEZOARDICIS variorum v. g. D. Michaelis, Rolfincii, & multis nominibus ob insignem vsum laudanda *Tinctura bezoardica Essentificata Wedeliana* intelligendum. Tacemus sirupos alexiterios, Elect. camphorat. Kegleri, a *Doleo* correctum & *cap. de febribus malignis p. m. 462.* descriptum, aliasque compositiones bezoardicas, quas omnes accessione sua efficaciores reddit.

Nec reticendi sunt pulueres bezoardici varii generis, qualis est inter alios puluis *Antitoxicus Mantuanus*, quem describit *Emanuel König in Ludovico Enucleato pag. 26.* R. rad. scorz. latifol. 3j. Contrayeru. anthor. unicorn. ver. margar. orient. a. 3ij. lap. bez. or. terræ sigill. a. 3j. smaragd. ppt. 3j. corall. alb. rubr. a. 3ß. sacchari alb. 3vj. M. Hic puluis satis celebris est in febribus malignis, & morbis epidemicis similibus.

Sic & puluis bezoard. polychrestus maior *Wedelianus*, ut & puluis præservativus, maioris apparatus, non parum virtutis ab hac radice mutuatur, quorum descriptiones cum in *Amœn. Mat. Med. & consilio Medico de peste* exstent, in illis transcribendis iam non occupabimur.

Dignum vero iudicamus addere & tertium, seu bezoardicum pretiosum, reliquis dicendis si non potiore, saltem parem: R. lap. bez. or. rad. contrayeru. serpentariæ Virginianæ veræ, perlar. præp. viperar. Italicar. antimoni diaphoretici a. 3ß. M. F. l. a. puluis, vel si lubet, globuli ad modulum aliorum, quos lapides vocant.

Ut enim ab Anglis primitus in usum tracta, ita etiam ab iisdem variis compositionibus alexipharmacis admixta est. Inter hæc principem sibi locum vendicat, qui nomen ab illa mutuatur LAPIS CONTRATERYÆ, cuius compositionem *pharmacopœia Bateana p. m. 100.* hoc modo describit: R. magist. C. C. corall. alb. rubr. margarit. succin. alb. ocul. 3. a. 3ij. rad. Contrayeru. 3ß. Apic. nigr. chel. cancer. 3ij. omnibus rite præparatis & commixtis adde gelatinæ viperar. q. s. ut fiant globuli, foliis auri obducendis atque caute siccandi s. a. Sunt, qui addunt ambr. gris. 3iß. Viribus pollet cardiacis, alexipharmacis & sudoriferis insignibus, hinc commendatur maxime in peste, variolis, morbillis

billis & febribus malignis aliis, omnibusque illis morbis, quibus pulvis e chelis \mathfrak{G} . compos. celebris est. Cum hoc enim eadem habet ingredientia, saltem quod lapidis bezoar orient. vices radix Contrayeruæ suppleat, cuius vsus etiam lapidi bezoar antefertur a *Nard. Ant. Reccho*.

In vsu iam fuit hic lapis *Morteno*, qui in *Pyretologia Exercit. 2. cap. 7. p. 339. 415.* & alibi passim in febribus continuis, ad malignitatem præcauendam, eundem commendat. Dosis illius ordinaria est a \mathfrak{B} . ad $\mathfrak{3}\mathfrak{B}$; quando vero malignitas maior adest, qualis in peste esse solet, tunc etiam ad \mathfrak{Dij} . augeri potest commode.

Post lapidem Contrayeruæ memorari meretur celebris ille pulvis *Cantianus*, siue *Comitisse a Kantb*, qui *Wilfio* Gasconicus audit, cuius basin vna cum apicibus nigris chelarum cancrorum constituit Contrayerua. Descriptionem eius vna cum viribus & vsu tradit supra citata *Pharmacop. Bat. p. m. 146.* quare in illa recensenda hic non immorabimur.

Denique & hoc addendum est, parari a nonnullis ex Contrayerua LAPIDES BEZOAR factitios sequentem in modum: \mathfrak{R} . rad. Contrayeru. $\mathfrak{3vj}$. lap. \mathfrak{G} . dent. equi marini, C. C. phil. a. \mathfrak{zij} . croci or. $\mathfrak{3}\mathfrak{B}$. ambr. \mathfrak{B} . gum. tragac. in aqua meliss. solut. q. s. F. massa, exacte miscenda, ex qua formantur globuli instar lapidum bezoar, lento calore exsiccan-di & in vitro seruandi. Habetur hoc modo medicamentum vili pretio prostant, viribus vero lapidi bezoar pretiosissimo non impar, in supra dictis morbis ad \mathfrak{Dj} . adhibendum. Ut taceamus, lapidum bezoar occidentalium originem & vires, si autoribus nonnullis credimus, maximam partem radici Contrayeruæ, a Capræceruis Indiæ Occidentalis comestæ, deberi.

Posse.

Possemus quidem plures compositiones satis celebres, quas Contrayerua ingreditur, adicere, si id opus esset; **ast** cum haecenus dicta sufficere possint, hic terminalia sunt.

SOLI DEO GLORIA!

CLARISSIMO DOCTORANDO

S. P. D.

PRÆSES.

HT venena, & antidota dignissima sunt exquisitu, illa; vt ne noceant, hæc, vt grauissimis casibus opitulentur, verbis *Celsi*, & polychresta sint. Inter venena *pharicum* cum primis celebratur, tanquam magis præsentaneum, quod *Guilandinus* vel idem, vel parum differre scribit, ab Hispanico de ballestera & de Ierua, ex radicibus hellebori albi confectum. Si ab hoc discessero, alterum est productum, καὶ τοῖς ταῖς ἀναισθησίαις, vt loquitur *Eresius*, certis temporibus occidere aptum, quæ ignorare satius est, nosse verò antidota. Tu scrutandum elegisti omnium horum præcipuum ex vegetabili regno. Laudo ingenii Tui excellentis dotes, & profectus in arte non vulgares. Macte his, ascende Cathedram, & publicæ laudes meas confirma! Ego singulares successus, & fructus vberiores non solum ominor, sed etiam a summo numine animitus apprecor. Dab. e musco

MDCCXII. D. II. Septembr.

